

(Bahagian Perancangan Dan Komunikasi Korporat)

Surat khabar: Berita Harian (Sarawak)

Hari/Tarikh: 17/3/2016

Muka surat: 7

Tajuk : Kajian tingkat pembiakan udang geragau

# Kajian tingkat pembiakan udang geragau

**Miri:** Kerajaan negeri akan membuat satu kajian khusus untuk meningkatkan pembiakan udang geragau atau dikenali sebagai 'bubok' dalam bahasa tempatan bagi mengekalkan khasanah laut itu.

Ketua Jabatan Perikanan Sarawak Wilayah Miri, Buniamin Kiprawi berkata, kajian dua tahun itu akan dilakukan oleh Institut Penyelidikan Perikanan Sarawak bertujuan memulihara hidupan laut itu daripada pupus akibat penangkapan secara berlebihan.

Beliau berkata, kajian dengan kerjasama Universiti Malaysia Sarawak (UNIMAS) itu juga membabitkan usaha mengenalpasti kaedah penangkapan bubuk paling sesuai berbanding penangkapan cara tradisional ketika ini.

"Sehingga kajian itu selesai

dalam tempoh dua tahun, kita membenarkan nelayan menangkap udang geragau menggunakan pukat halus yang dikenali dengan nama 'pakak'.

"Bagaimanapun, pukat tunda kecil dan bergelang masih tidak dibenarkan sama sekali kerana ia boleh menjeras dan memusnahkan hidupan laut," katanya.

Beliau berkata demikian pada Majlis Interaksi Bersama Komuniti Perikanan, Cabaran Strategik Ke Arah Pengurusan Sumber Perikanan Tangkapan Mapan yang turut dihadiri Menteri Muda Perhubungan negeri, Datuk Lee Kim Shin, di sini, semalam.

Buniamin berkata, pukat tunda kecil dan pukat tunda bergelang yang digunakan segerintir nelayan tempatan menangkap udang geragau diha-



**Nelayan di utara Sarawak tidak lagi dibenarkan menangkap bubuk menggunakan pukat tunda.**

[FOTO KANDAU SIDI/BH]

ramkan kerana kesannya lebih buruk terhadap ekosistem marin dan merosakkan dasar laut.

## Rosak habitat

"Penggunaan pukat tunda bukan sahaja boleh merosakkan habitat sesetengah hidupan laut, malah boleh memusnahkan kawasan pembiakan ikan dan juga terumbu karang."

"Jika penggunaan pukat itu dibiarkan, bukan sahaja ekosistem terjejas dan dasar laut musnah, malah kita percaya bekalan sumber perikanan atau marin juga turut terjejas,"

katanya.

Sementara itu, Kim Shin berkata, nelayan dan Jabatan Perikanan Sarawak sudah mencapai kesepakatan dalam isu penangkapan udang geragau selepas kelonggaran diberi bagi membolehkan nelayan menggunakan pakak menangkap bubuk dan larangan penggunaan pukat tunda.

Katanya, agensi penguasa terutamanya Jabatan Perikanan Sarawak harus menghalau nelayan yang menangkap udang geragau menggunakan pukat tunda, jika dikehendaki berbuat demikian.